

UDHËZIM
Nr. 16, datë 20.7.2022

PËR RREGULLAT DHE PROCEDURAT PËR LËSHIMIN E DOKUMENTIT TË IDENTIFIKIMIT TË DETARIT (PASAPORTË DETARI), PËR SHTETASIT E HUAJ/PA SHTETËSI, PËR QËLLIME PESHKIMI, NË REPUBLIKËN E SHQIPËRISË

Në mbështetje të pikës 4, të nenit 102, të Kushtetutës, të ligjit 9000/2003, “Për organizimin dhe funksionimin e Këshillit të Ministrave”, shkronjës “b”, të nenit 401, të ligjit nr. 9251, datë 8.7.2004, “Kodi Detar i Republikës së Shqipërisë”, të ndryshuar,

UDHËZOJ:

Neni 1
Qëllimi

Qëllimi i këtij udhëzimi është përcaktimi i rregullave dhe procedurave që do të ndiqen nga institucionet shqiptare, për lëshimin e dokumentit të identifikimit të detarit (Pasaportë Detari), për shtetasit e huaj/pa shtetësi, për qëllime peshkime, në Republikën e Shqipërisë.

Neni 2
Fusha e zbatimit

1. Ky udhëzim zbatohet për të gjithë detarët me shtetësi të huaj/pa shtetësi, në territorin e Republikës së Shqipërisë, të cilët kërkojnë të pajisen me dokument identifikimi (Pasaportë Detari) nga institucionet shqiptare të parashikuara me ligj, me qëllim peshkimi.

2. Ky udhëzim nuk zbatohet për detarë që imbarkohen në bordin e mjeteve lundruese në përdorim të Forcave të Armatosura, kapitenarive të Porteve, Policisë Kufitare, Doganës dhe organeve të tjera shtetërore të parashikuara me ligj.

3. Shtetasit e huaj/pa shtetësi do të pajisen me dokument identifikimi (Pasaportë Detari), në Republikën e Shqipërisë, vetëm për lundrim kombëtar/të brendshëm.

Neni 3
Formati i Pasaportës së Lundrimit

1. Format i dokumentit të identifikimit të detarit (Pasaportë Detari) propozohet nga Drejtoria e Përgjithshme Detare dhe miratohet nga ministri përgjegjës për transportin detar.

2. Dokumenti i identifikimit të detarit (Pasaportë Detari) që kanë aplikuar sipas legjislacionit në fuqi dhe ka plotësuar kriteret e parashikuara në këtë udhëzim, do të lëshohet nga zyra përkatëse për regjistrimin e detarëve, në Drejtorinë e Përgjithshme Detare.

Neni 4
Amëza e detarit

1. Drejtoria e Përgjithshme Detare merr masa për mbajtjen e amzës për detarët me shtetësi shqiptare, sipas parashikimeve në nenin 106 të Kodit Detar.

2. Drejtoria e Përgjithshme Detare merr masa për mbajtjen e amzës për detarët me shtetësi të huaj.

3. Drejtoria e Përgjithshme Detare ndjek procedurën dhe administron dokumentacionin përmes, Zyrës së Regjistrimit të Mjeteve Lundruese dhe Detarëve, për Amëzën e Detarit.

Neni 5

Kriteret për pajisjen me pasaportë lundrimi të detarëve me shtetësi të huaj/pa shtetësi, për Flotën e Peshkimit

1. Detarët me shtetësi të huaj/pa shtetësi, që kërkojnë të pajisen me dokument identifikimi (Pasaportë Detari), për t'u imbarkuar në mjetet lundruese të peshkimit, duhet të ngarkojnë në portalin *e-Albania* dokumentacionin, si më poshtë vijon:

- a) kontratën e punësimit si detar (origjinale);
- b) certifikatë shëndetësore për detarët, lëshuar nga Shërbimi Shëndetësor Portual;
- c) dokumentin për analizën e grupit e gjakut (origjinale);
- d) lejen Unike, në Republikën e Shqipërisë;
- e) pasaportën e Detarit të lëshuar nga shteti i tij;
- f) dokument kualifikimi për detyrën që do të kryej (nëse ka).
- g) mandatpagesa sipas llojit të shërbimit.
- h) dy fotografi (5 x 4 cm për dokument të cilat dorëzohen fizikisht në zyrën përkatëse);

2. Dokumentet që nuk janë në gjuhën shqipe duhet të jenë të përkthyer në shqip dhe të noterizuara, sipas legjislacionit shqiptar në fuqi.

3. Pasaporta e detarit do t'i lëshohet në të njëjtin pozicion, siç e ka të përcaktuar në pasaportën e lëshuar nga shteti i kandidatit.

4. Në rastet kur Pasaporta e Detarit, e lëshuar nga shteti i kandidatit nuk e ka të përcaktuar nivelin e pozicionit atëherë Drejtoria e Përgjithshme Detare do të bëjë një testim në zbatim të legjislacionit në fuqi për përcaktimin e nivelit të pozicionit të punës që mund të kryejë në anije.

5. Detarët me shtetësi të huaj, që kërkojnë të pajisen me dokument identifikimi (Pasaportë detari), para marrjes së saj duhet të dorëzojnë fizikisht pranë Zyrës së Regjistrimit të Mjeteve Lundruese dhe Detarëve, Pasaportën e Detarit të lëshuar nga shteti i tyre i cili do të mbahen në dosjen e detarit.

6. Ky dokument do t'i kthehet përsëri zotëruesit, pasi do të dorëzojë te zyra e regjistrimit të detarëve në Drejtorinë e Përgjithshme Detare, pasaportën e detarit të lëshuar nga kjo zyrë.

7. Afati i vlefshmërisë së dokumentit të identifikimit të detarit, për shtetasit e huaj apo për ato pa shtetësi, do të korrespondojë me afatin e kohëzgjatjes së Lejes së Unike, në Republikën e Shqipërisë.

8. Shtyrja e afatit të Pasaportës së detarit do të bëhet sa herë rinovohet Leja Unike, nga autoritetet kompetente;

9. Për shtyrjen e afatit të Pasaportës së Detarit, detari me shtetësi të huaj/pa shtetësi do të paraqesë fizikisht te zyra e regjistrimit të detarëve dokumentet origjinale të mëposhtme:

- a) Pasaporta e Detarit;
- b) leja Unike e rinovuar nga autoritetet kompetente;
- c) certifikatë shëndetësore për detarët, lëshuar nga Shërbimi Shëndetësor Portual; dhe
- d) kontratën e punësimit si detar (origjinale).

Neni 6

Ankimi kundër refuzimit të lëshimit të pasaportës së detarit

1. Kundër refuzimit të lëshimit të pasaportës së detarit, detari ka të drejtën e ankimit administrativ te Drejtoria e Përgjithshme Detare, sipas afateve të përcaktuara në Kodin e Procedurave Administrative.

2. Procedura e shqyrtimit të ankimit administrativ duhet të përfundojë brenda 30 ditëve nga data e depozitimit të ankimit administrativ. Kundër vendimit të DPD-së bëhet ankim në gjykatën kompetente për çështjet administrative, sipas legjislacionit në fuqi.

Neni 7

Dispozita të fundit

1. Ngarkohet Drejtoria e Përgjithshme Detare, për zbatimin e këtij udhëzimi.
2. Ky udhëzim hyn në fuqi pas botimit në Fletoren Zyrtare.

MINISTËR I INFRASTRUKTURËS DHE ENERGJISË
Belinda Balluku